

**OBRAĆANJE TUŽIOCA BARAŠINA NA SASTANKU SA
PREDSTAVNICIMA NOVINARA, IZVJEŠTAČA O TEMAMA
PRAVOSUDNIH INSTITUCIJA BIH.**

Sarajevo, 18.12.2007. godine

Poštovani predstavnici medija, cijenjeni gosti,

Prije svega želim vas pozdraviti u ime institucije Tužilaštva Bosne i Hercegovine i u svoje lično ime.

U Tužilaštvu Bosne i Hercegovine svjesni smo uloge javnosti i medija u praćenju procesa u pravosuđu, naročito predmeta u kojima se procesuiraju krivična djela ratnog zločina.

Upravo putem medija, rezultati rada agencija za sprovođenje zakona postaju dostupni i prezentovani javnosti.

Prije nekoliko sedmica, u Tužilaštvu BiH upriličena je konferencija za medije na kojoj su predstavljeni novoizabrani rukovodioci Odjela za ratne zločine u Tužilaštvu BiH.

Takođe, tada smo najavili aktivan pristup i odnose sa medijima koji će se manifestovati u velikom broju informacija i saopštenja za medije, kao i u čestim kontaktima predstavnika Tužilaštva BiH sa medijima.

Zastupljenost tema koje se odnose na rad Tužilaštva BiH u medijima izuzetno je velika, i svi ste svjedoci da su u centralnim informativnim emisijama, kao i na prvim stranicama dnevne i sedmične štampe, svakodnevno zastupljene teme koje se odnose na rad tužilaštava, sudova i agencija za sprovođenje zakona.

Ono što želim istaći je da odnos između tužilaca i medija mora biti na visoko profesionalnoj osnovi, uz poštovanje prava javnosti da zna, ali i uz poštovanje normi tužilačke etike i zaštite interesa istrage i krivičnog postupka.

Dakle, poštivajući odredbe novinarske profesionalnosti i tužilačke etike, saradnja između medija i Tužilaštva BiH može biti kvalitetna i obostrana.

Naročito se trebaju spriječiti i izbjeći situacije da se putem određenih medijskih natpisa ugrožava istraga, sigurnost svjedoka ili žrtava, kao i situacije da određeni lobiji ili lica direktno zainteresovana za postupak, vrše manipulaciju medija i instrumentalizuju medije kako bi vršili pritisak na pravosuđe.

Cijenjeni predstavnici medija, kako sam dugo u pravosuđu, već više od 20 godina, a pratim i rad medija, mogu vam reći da sam često u prilici da vidim da lica koja su osumnjičena ili optužena ili njihovi saradnici,

upravo iz straha od skorog procesuiranja, preko medija pokušavaju vršiti pritisak na pravosuđe.

Zbog toga apeliram na Vas da budete oprezni i promišljeni i ne dozvolite da sa vama manipuliraju osobe ili određene interesne grupe, kako bi vas iskoristili kao sredstvo pritiska na pravosuđe.

Kao zamjenik Glavnog tužioca i zamjenik rukovodioca Odjela za ratne zločine, obećavam vam da ćemo u budućnosti imati dobru i kvalitetnu saradnju. Mi smo u Tužilaštvu BiH shvatili da postoji veliki interes javnosti za naš rad i činimo napore da se što više poboljšaju modaliteti saradnje.

Internet stranica Tužilaštva BiH ažurira se i nadopunjava svakodnevno, naš Ured za odnose s javnošću u svakodnevnom je kontaktu sa novinarima i odgovara na upite medija.

Ono što je možda problem, je postojanje velikog broja medija u Bosni i Hercegovini, što stvara veliku konkurentnost i potražnju za informacijama, pa dolazi do situacija do određeni mediji nastoje, u potrazi za ekskluzivnošću, objaviti neke zaštićene detalje o istragama i predistražnim postupcima, što se ne smije dešavati i što može samo štetiti postupku.

Koliko ove situacije mogu biti štetne, pokazuje i činjenica da smo u tužilaštvu imali situaciju da je zbog objavljivanja jedne ratne fotografije u novinama došlo u pitanje prepoznavanje optuženog od strane svjedoka u sudnici.

To su situacije koje moramo zajednički spriječiti.

Cijenjeni predstavnici medija, ja vas pozivam na kvalitetnu, profesionalnu i obostranu saradnju medija sa Tužilaštvom BiH. Od naše saradnje zasnovane na profesionalnim i etičkim principima, koristi će imati svi građani Bosne i Hercegovine, kao konzumenti medijskih informacija.

Ujedno Vam se zahvaljujem na dosadašnjoj pažnji i vremenu i Vašem radu koji posvećujete temama vezanim za rad Tužilaštva BiH.

Hvala vam.